

Cristiannan Uni Reforzando e Potencialnan di Aruba

**C.U.R.P.A.**

**Programma Politico 2017 – 2021  
SALBA ARUBA**



Aruba, Augustus 2017

# **CONTENIDO**

|  |    |
|--|----|
| INTRODUCCION: Salba Aruba .....                                  | 1  |
| FINANSAS PUBLICO/DEBE: Rescata, sana y responsabiliza .....      | 2  |
| ECONOMIA: Fuerte y diversifica .....                             | 4  |
| TURISMO: Dinamico y competitivo .....                            | 6  |
| ANTI-CORRUPCION: Caba cu corrupcion .....                        | 8  |
| HUSTICIA Y CRIMINALIDAD: Proteccion contra inhusticia .....      | 10 |
| IMMIGRACION: Vol is vol .....                                    | 12 |
| SALUBRIDAD PUBLICO: Bo salud prome .....                         | 15 |
| ENSEÑANZA: Mihor calidad y resultado .....                       | 17 |
| ASUNTONAN SOCIAL Y LABOR: Oportunidad y progreso .....           | 18 |
| OBRANAN PUBLICO: Synergia y ordo .....                           | 20 |
| MEDIO AMBIENTE: Conserva naturaleza y reduci sushi.....          | 22 |
| TRANSPORTE: Mas opcion y mas barata .....                        | 24 |
| TELECOMMUNICACION Y MEDIA: Accesibilidad, berdad y decenci ..... | 25 |
| AGRICULTURA, PESCA Y CRIA DI BESTIA: Nos mesun cuminda .....     | 26 |
| IMPUESTO: Mas placa den cartera .....                            | 27 |
| EDAD DI PENSIOEN: Scohe bo edad .....                            | 29 |
| DEPORTE: Aruba isla deportivo .....                              | 30 |
| NORMANAN Y BALORNAN: Bendicion no maldicion .....                | 31 |
| RESUME: Un Aruba nobo.....                                       | 32 |



## INTRODUCCION

### Salba Aruba


Aruba ta na rand di abismo. No tin husticia y ta wordu midi cu diferente midi. Corrupcion a para bira algo normal y e piscanan grandi ta sigui cana rond manera nada no a pasa. Economia ta stagna y dia pa dia mas negoshinan ta sera nan portanan causando mas desempleo. Aruba su fronteranan ta hancho habri na unda no tin un control di ken ta drenta y sali. E fenomeno di cheap labor ta keda un menaza pa e trahador y ta stroba progreso den salario. Salubridad publico no ta na unda e mester ta y no ta tene cuenta cu salud di hende manera mester ta. Aruba tin un debe monstrozo causa pa gobiernonan inepto pa maneha un finanzas publico responsabel y sano. Un sistema di educacion antiqua y di un calidad cu no ta na beneficio di e alumno. Atraconan, ladronicia y criminalidad ta tuma lugar tur rond aumentando dia pa dia. Un decadencia di normanan y balornan den comunidad na unda malo a para bira bon y bon a para bira malo, un sociedad na unda tin un free for all.

Tradicion di e instituto di famia ta na peliger cu un cambio di eCodigo Civil anti-famia cu ta na porta di wordu introduci. Un Parlamento cu a aproba un amienda 7 pa duna derechonan igual na parehanan homosexual y heterosexual cu e derechonan di esnan cu casa treciendo asina un maldicion pa Aruba. Nos tin un Parlamento cu no ta funciona y na unda no tin decencia y respect. Nos tin politiconan cu no tin integridad y ta para gaña e pueblo cu cara seco. Un aparatu gubernamental gigantesco causa pa patronahe politico. Contractnan cu ta wordu firma sin wordu lesa cu consequencianan negativo grandi pa Aruba. Un Aruba cu a perde su autonomia y ta na punto di perde mucho mas. Un turismo cu a keda na unda e ta apesar di a haya 4 biah mas placa. Terrenonan di e Pais ta wordu regala na compinchinan politico. San Nicolaas cu no tin progreso y cu ta wordu tuma di haci campana tras di campana. Un sistema di impuesto mas halto den mundo cu ta castiga e pueblo y economia. Un isla cu ta depende mucho ariba importacion di cuminda, energia y fuel. Un isla caro na unda dia pa dia e poder di compra ta sigui bai atras. No ta duna atencion adecua na nos grandinan, pobernan, esnan incapacita, vuidanan y huerfonan. Un politica corrupto y sinberguenza cu no tin Aruba na pecho. Por ultimo un Pais cu dia pa dia kier saca Dios for di tur cos y enbez di pone Dios centraal como fundeshi di e Pais kier pone e hende centraal. Tur esakinan y mucho mas ta pone Aruba na rand di abismo y ta haci cu si no actua awor y salba Aruba awor no lo bai tin un Aruba cu un futuro biryante mas y lo termina sin e bendicion y protecion di Dios.

Den e programa politico di partido CURPA, Salba Aruba, nos kier crea un Aruba nobo cu un direccion nobo na unda husticia, ordo, prosperidad, oportunidad pa tur, paz y normanan y balornan Cristian ta prevalece. Cu nos programma Salba Aruba nos lo pone Aruba bek ariba su pianan y percura cu Dios ta centraal pasobra ningun plan pa Aruba lo prospera sin Dios. Ban salba Aruba prome cu ta laat.



Drs. Robert F.L. Anje  
Presidente CURPA



Cristina Lampe B.A.  
Lider politico CURPA

## **FINANSAS PUBLICO/DEBE** **Rescata, sana y responsabiliza**

E debe nacional ta como 86 cen pa cada florin anto esaki no ta inclui e PPP proyectonan green corridor, hospital y Watty Vos Boulevard. Si esakinan wordu conta e debe nacional lo surpasa 100% cu lo trece e florin na peliger. Pesey e ta importante pa nos baha e debe rapido y bin cu un maneho financiero responsabel y sano. Partido CURPA lo rescata, sana y responsabiliza e finansas publico di Aruba y den e seccion aki nos lo splica con nos lo hasi esaki.

### **1. Baha e debe y suma di interes**

Prome cos cu nos lo haci ta pa balancia e presupuesto 2018 pa evita asina cu mas debe ta wordu traha. Tambe nos lo cambia e manera con ta paga e debe esta enbez di paga mensual nos lo paga e debe cada 2 siman. Esaki lo hasi cu e debe lo wordu paga bek den menos tempo y tambe cu e suma cu mester paga na interes lo baha. Nos lo bai sinta tambe cu nos fiadornan na mesa pa wak e posibilidad di haya un kwijtschelding parcial di e debenan pa asina na final nos consolida e debenan den 1 debe na unda nos lo negocia un interest mucho masa abou cu loke ta wordu paga awor. Si nos ehecuta punto 1 nos debe lo baha y tambe e suma cu nos ta paga na interes cu actualmente ta mas cu 200 Miyon florin pa aña.

### **2. Baha e gastonan di gobierno**

E gastonan di gobierno ta halto y tin tiki espacio pa baha gasto. Pero tin por lo menos 3 categoria di gasto cu nos por baha drasticamente y scapa Aruba Miyones. Nos ta kere cu e viahenan di trabow cu e politiconan ta hasi rond di mundo por baha drasticamente. Tambe huurmento di edificio y servicio di consultant. Hopi di e gastonan aki no ta necesario pero mas bien ta privilegionan y dunamento di fabor politico na conocirnan y famia di e politiconan.

### **3. Baha e gastonan di e aparatu gubernamental sin kita personal**

Nos tur sa cu e aparato gubernamental ta mucho grandi. Nos tin di baha esaki sin cu mester kita hende. Pa cuminsa nos lo baha e cantidad di minister di 9 pa 7. Tambe nos lo limita e cantidad di coordinador cu cada minister por tin na 14, 7 externo y 7 interno. Mester wak tambe cua di e tareanan di gobierno por wordu independiza y tambe por wak cua tareanan por wordu automatiza y na unda por usa technologia. Un personeelsstop tambe ta na su lugar cu excepcion di e trahadornan den husticia, maestro y cuponan di trabow cu falta experticio. Pa evita cu hendenan ta wordu nombra via di e sistema patronage politico cu nombramiento di ambtenaar pa fabor politico lo mester cambia e ley di tal forma cu un minister cq ministerraad no ta nombra of duna promocion na un ambtenaar mas. Esaki lo preveni cu gastonan lo sigue subi.

### **4. Crea mas placa den caha di gobierno sin medida**

E pilar di economia nobo di remedii di tera legal lo genera entrada pa gobierno. E lo aporta na loonbelasting, winstbelasting y lo aumenta e GDP. Tambe nos plan pa crea un economia fuerte lo genera mas entrada pa gobierno. Den nos plan di immigracion nos lo para tur otorgamiento di permiso causando asina cu e salario minimo lo subi locual lo significa mas loonbelasting den caha di gobierno. Tambe e placa cu ATA SG ta haya na room tax (Tourism levy) mester bai den caha di gobierno cual ta un suma bastante grandi di mas o menos 70

Miyon pa aña. Mester percura tambe cu companianan di gobierno genera mas ganashi pa asina mas dividendo drenta den caha di gobierno.

##### **5. Cambia e ley di Comptabilidad**

Mester sera e buraconan den e ley di Comptabilidad cu ta duna gobierno maneranan legal pa otorga proyectoran na compinchinan sin aprobacion adelanta di Parlamento. Tambe mester por denuncia hortamento di placa directamente na Ministerio Publico sin cu minister mester duna aprobacion. Mester introduci tambe un Management Information System (MIS) na unda arriba diferente nivel gastonan ta wordu controla.

E maneho stipula aki arriba lo percura cu e debe lo baha liher y tambe e suma cu ta paga na interes. Tambe mas entrada lo drenta den caha di gobierno sin bin cu medida. Aruba su presupuesto lo mira un surplus y mitar di e surplus aki lo wordu usa pa paga e debe y e otro mitar pa pone den un fondo pa gastonan inespera. Unabez nos tin nos finansas publico na ordo cu un gobierno serio di CURPA CAFT por wel di bai su cas y nos lo recobra nos autonomia financiero back.

## **ECONOMIA Fuerte y Diversifica**

Dia pa dia negoshinan ta cera porta of ta abandona Aruba causando desempleo, menos placa den caha di gobierno y fondonan y menos actividad economico. Partido CURPA lo diversifica e economia y crea condicionan favorabel pa negoshinan opera aden. Nos lo crea un economia fuerte y diversifica den cual lo crea cuponan di trabow, lo trece mas placa pa e negoshi y ciudadano, lo focus ariba exportacion y lo stimula E-commerce local.

### **1. Crea un pilar economico nobo di remedii di tera legal**

Aruba ta conoci di tin varios remedii di tera legal cu por wordu usa pa mehora e salud di un persona. Nos kier desaroya e potencial aki door di inclui remede di tera legal cu ta produci na Aruba den e pakete di AZV. Di e forma aki nos por stimula entrepreneurs drenta e mercado di remedii di tera legal creando asina cuponan di trabou. Si e remedenan di tera produci na Aruba resulta bon esakinan por wordu exporta pa otro paisnan den mundo un mercado di 107 Biyon di Dollar. Nos ta kere cu e remedinan di tera cu Aruba conoce cu ayudo di AZV por crea un pilar economico nobo pa Aruba. Un producto traha y cumpra na Aruba.

### **2. Baha e impuesto di ganashi (winstbelasting) pa 15%**

Partido CURPA lo baha e impuesto di ganashi pa companianan pa 15%. Esaki lo significa cu companianan tin mas placa disponibel pa inverti den cuponan di trabou, materiaal, produccion etc. stimulando asina e economia di Aruba.

### **3. Cambia e sistema di belasting pa uno di 3 tarifa**

Aruba ta #1 den mundo di belasting mas halto 58.9%. Actualmente tin un sistema di cobra belasting ariba un manera progresivo. Esaki ta encera cu mas bo entrada ta mas belasting bo ta paga. E sistema ki mester wordu cambia pa un sistema di 3 tarifa. Den nos sistema bo ta paga 5% di belasting ariba entrada te cu Afl. 35 mil, 15% di belasting ariba entrada entre Afl. 35 mil y Afl. 75 mil y 30% di belasting ariba entrada mas cu Afl. 75 mil. E sistema nobo aki lo stimula e asina yama 'small businesses' e asina yama eenmanszaken cu ta un sector hopi importante den nos economia. Cu nos sistema nan lo resta basta placa cu nan por inverti den nan negoshi por ehempel crea mas cuponan di trabou y expande nan producto y servicionan. Tambe nos sistema nobo di belasting di 3 tarifa lo hisa e poder di compra di e ciudadano y asina e placa adicional cu e pagador di belasting lo haya por wordu usa pa cumpra mas producto y servicio stimulando asina e economia.

### **4. Bin cu un tax holiday pa companianan nobo cu kier inverti na Aruba**

Nos lo bin cu un tax holiday di 0% pa companianan nobo cu kier inverti un cierto suma y cantidad di empleado den nos economia. E tax holiday aki solamente ta pa companianan cu lo crea cuponan di trabou cu ta rekeri un cierto experticio. Di e forma aki nos kier crea mas cuponan di trabou professional pa entre otro nos Arubiananon professional. E structura di tax holiday lo ta hopi interesante pa companianan manera clinica medico.

## **5. Simplifica reglanan y proceduranan pa lanta un compania**

Mester cambia leynan, proceduranan pa tin menos burocracia pa lanta un compania.

Mester ta posibel pa lanta un compania den 48 hora sea den persona of via internet. No porta asina cu un negoshi mester warda lunas si no ta añas pa haya cierto permiso pa opera.

Tur esaki solamente ta stroba actividad economico.

## **6. Stimula exportacion**

Aruba ta un isla di importacion nos ta importa hopi pero hopi mas cu nos ta exporta. Esaki no ta bon pa e economia. E pilar economico nobo di remedи di tera legal cu nos kier crea si resulta bon por contribui grandimente na e GDP pero tambe exportacion. E mercado mundial di remedи suplemento ta como 107 Biyon di Dollar y solamente un fraccion di esaki pa Aruba lo tin un impacto economico grandi. Tambe nos kier stimula exportacion di pesca. Nos lo habri e mercado di pesca manera stipula den nos plan di agricultura, pesca y cria di bestia. Por ultimo por stimula exportacion door di deshaci di un freezone fisico y laga Aruba henter ta un freezone via di un sistema di accounting estricto. Di e forma aki bo ta expande bo actividad di freezone ariba henter e isla sin cu mester ta fisicamente como un compania presente den un area di freezone cu ta wordu controla door di douane.

## **7. Stimula E-commerce local**

Nos kier stimula E-commerce pero ariba nivel local. Un compania por registra como un compania cu ta ofrece E-commerce y haya un impuesto di ganashi (winstbelasting) di 7.5% ariba productonan y servicionan bendi via di internet. Di e forma aki companianan por expande nan actividad den un mercado mas amplio y clientenan por cumpra productonan y servicionan local via di internet. Tur esaki lo stimula e economia local.

E ta e tarea di gobierno pa crea condiconan favorabel pa companianan opera aden y crea oportunidad nobo y alavez laga placa draai den e economia pa asina negoshinan tin benta. Nos plan economico lo hasi esaki.

## **TURISMO Dinamico y Competitivo**

Turismo di Aruba ta laga hopi di desea. A privatiza ATA pa un Sui Generis pero e privatizacion aki ta malisimo haci y a crea un organisacion cu ta mas burocratico cu tempo cu e tawata un departamento di gobierno. ATA SG no por adapta su mes na desaroyonan di competencia y e resultado di turismo ta laga hopi di desea peor ainda cu nan a haya 4 biahia mas placa pa gasta. Mester hasi cambionan den turismo prome cu ta laat y nos competencia pasa nos voorbij. No por hunga cu turismo y politikeria mester keda afor.

### **1. Cambia ATA SG pa un ATA N.V.**

Desaroyonan den turismo internacional ta hopi dinamico y un organisacion burocratico manera ATA SG no ta funciona den un mercado turbulento asina. Pesey e ta importante pa cambia ATA SG den un ATA N.V. Cu business units cu por adapta rapido na desaroyonan turistico. E N.V. aki lo ta den forma di un Public Private Partnership na unda stakeholders den turismo na Aruba tin shares aden y na unda gobierno lo tin 40% di e shares pa evita politikeria den e organizacion. Door di inclui stakeholders como partners den e N.V. nos por crea un synergia den e mundo turistico y lo ta un win win pa tur envolvi.

### **2. Crea un programa di strategic alliance**

**Ariba terreno turistico** nos no por para arriba nos mes. E unico manera pa sobrevivi e ora ey ta pa sera un strategic alliance cu otro islanaan. Nos lo keda competi cu otro pero cu un strategic alliance bo ta logra mas. E strategic alliance lo mester ta cu e islanaan den Reino Hulandes. Un ehempel ta pa introduci un air pass na unda e turista por bula entre e islanaan pa un suma atractivo y asina experiencia cada isla. Ta keda na e islanaan pa ofrece e mihior producto posibel pa asina sea nan ta regresa of duna un recomendacion. Por sera stategic alliances cu companianan crusero tambe.

### **3. Stimula turismo di convencion**

Turismo di convencion a baha drasticamente. Gobierno no ta duna suficiente incentiva pa companianan trece un convencion na Aruba. Fuera di esey e Ley di all inclusive ta stroba tambe. Mester duna mas incentiva y cambia e ley di all inclusive pa atrae mas turismo di convencion.

### **4. Stimula turismo di deporte**

Den nos maneho di deporte nos lo bai atrae mas weganan internacional pa Aruba. Ora hungadornan bin nan ta bin cu coach, familia, amigo, fans etc. cu por ta algo grandi pa e turismo di Aruba.

### **5. Oficina di ATA na Asia**

Nos mester diversifica nos turismo y nos lo pone un oficina permanentemente na Asia pa asina atrae turismo for di e region ey.

## **6. Calidad di servicio**

Calidad di servicio a bai hopi atras. Trahadornan ta frustra na trabou y esaki ta expresa su mes den e servicio duna na e turista. Nan tin miedo di perde nan trabou y ta wordu mal paga tur pa motibo di e cheap labor. Nos maneho di para tur permiso di trabou lo duna e trahador mas siguranza cu nan trabow no ta wordu kita door di un trahador barata y tambe cu nan salario por subi. Tur esaki lo tin un efecto positivo arriba e calidad di servicio duna na e turista.

## **7. No mas hotel**

Nos lo para tur permiso pa traha mas hotel. Solamente por bende un hotel na un otro doño pero esaki mester ta un calidad di hotel mas halto cu ta posibel.

## **ANTI CORRUPCIONN Caba cu corrupcion**

Corrupcion ta bin den differente forma. Ora un funcionario haci uso di su poder y autoridad en cambio pa beneficio propio nos ta papia di corrupcion. Tambe tin corrupcion ora un funcionario den poder y autoridad inhustamente a benificia sponser, amigo y famia.

Corrupcion no ta bon pa un pais pasobra entre otro: 1. E ta costa comunidad hopi placa por ehempel Setar. 2. E ta manera un cancer ya cu corrupcion ta crea mas corrupcion. 3. E ta trece desconfiansa cune den gobierno. 4. E ta stroba e desaroyo economico door di menos inversion. 5. Corrupcion ta baha confianza den pueblo den un gobierno cu ta baha e cumplimiento di paga belasting creando mas deficit. Partido CURPA lo bin cu un maneho anti corrupcion estricto. Esun cu kier haci un acto corrupto lo pensa 2 biahia prome cu haci esaki. Lo tin un maneho na unda nos lo ruim op de boel y esnan corrupto lo mester paga pa nan accionan. CURPA lo pasa un basora di hero anti corrupcion den e aparato gubernamental y sistema politico.

### **1. Investigacion di actonan corrupto door di un tercer partido**

Aruba ta asina putri di corrupcion cu nos mes no por investiga actonan di corrupcion. Un corrupto no por investiga un corrupto. Mester laga un tercera partido manera Transparency International investiga actonan corrupto na Aruba. Hopi pais corrupto manera Colombia a haci esaki anto cu exito. Mester cuminsa sera e asina big fish pa duna un ehempel cu no ta tolera ningun forma di corrupcion. Na otro paisnan manera merca politiconan ta wordu sera pa cosnan chiquito y aki na Aruba tur ta cana rond cu cara na laira. Unabez cu sera e big fish un ehempel lo wordu duna pa pensa dos biahia prome cu haci un acto corrupto.

### **2. Analisa e risiconan den departamento pa corrupcion**

Mester laga e analistanan di riesgo haci un estudio di e riesgonan cu tin den departementonan den entre otro e organizacion administrativo y funcionan cu ta vulnerable pa corrupcion. Na unda ta necesario lo mester adapta proceduranan y introduci rotacion di funcion.

### **3. Cambia leynan**

Mester cambia leynan di tal forma cu 1. No mester depende di minister pa cuminsa cu un investigacion di actonan corrupto y 2. Cu ta sera e buraconan den e ley di Comptabilidad pa loke ta trata otorgamento di proyectonan sin aprobacion adelanta di Parlamento.

### **4. Usa e instrumento di Parlamentaire Enquête**

Desde Status Aparte e Parlamento no a haci uso di e instrumento di Parlamentaire Enquête pa investiga proyectonan corrupto. Claro cu ningun partido a usa esaki pasobra un corrupto cu tin manteca ariba nan cabez no ta investiga un otro corrupto cu manteca ariba nan cabez. Partido CURPA lo hasi uso di e instrumento di parlamentaire Enquête pa investiga proyectonan cu ta hole corrupto.

## **5. Amplia e ley di Openbaarheid van Bestuur**

Amplia e ley di Openbaarheid van Bestuur (LOB) cu un seccion di boet na unda un minister mester paga un boet si un departamento of e mes no kier copera di duna informacion na un ciudadano of Parlamento.

## **6. Introduci un Management Information System (MIS)**

Pa tin un mihor check y balance mester introduci un Management Information System ariba diferente nivel na unda un por controla e otro.

## **7. Fortifica Algemene Rekenkamer y Centraal Accountants Dienst**

### **8. Watermerk y digitaliza documentonan**

Pa evita falsificacion manera a pasa den entre otro permiso gate y paspoort gate por watermerk y digitaliza documentonan ora nan wordu trata door di diferente departamentonan y funcionarionan.

### **9. Un klokkenliderswet**

Nos lo introduci un klokkenliderswet cu lo proteha y recompensa e klokkenluider di tal manera cu nan no mester traha mas door di duna nan un percentaje di e placa recupera den forma di lumpsum of salario.

### **10. Aansprakelijkheidswet**

Introduccion di un aansprakelijkheidswet na unda esnan corrupto mester paga tur cos back cu nan placa priva.

### **11. Ley pa registra activa y passiva**

Lo bin cu un ley na unda un minister, parlamentario y director di departamento y compania estatal mester duna un cuenta di su activa y passiva prome cu accepta e funcion y tur activa y passiva cu wordu aumenta drasticamente mester wordu responsabiliza y investiga.

### **12. Norma di 10% pa proyectoran**

Mester bin cu un regla cu proyectoran no mag di surpasa 10% di e costo y tampoco 10% den tempo. Esnan cu ta ehucuta e proyecto lo mester paga un boet si nan surpasa e 10% regla aki.

### **13. Term limit pa politiconan**

Pa preveni cu politiconan bira corrupto mester introduci un term limit. Mas largo un persona keda como un politico mas grandi e chance ta bira cu e por comete actonan corrupto. Un persona no por ta mas cu 6 año como parlamentario y un minister no por ta mas largo cu 4 año un minister.

### **14. Campaña di concientizacion**

Nos lo bin cu un campana di concientizacion pa informa tur hende di e importancia cu corrupcion mester wordu preveni y combati y cu lo no tin tolerancia si wordu gara. Emphasis lo wordu duna na e importancia di etica den gobernacion y e aparatu gubernamental.

## **HUSTICIA Y CRIMINALIDAD**

### **Proteccion contra inhusticia**

Husticia ta laga hopi di desea. Hueznan no ta dicta sentencia manera mester ta y ta midi cu diferente midi. Un Ministerio Publico cu prioridadnan robez y cu no ta persigui e piscanan grandi pero mas bien e piscanan chiquito creando asina un sistema di husticia di clase (klassen justitie). Atraco y ladronicia a para bira algo normaal y ta aumentando dia pa dia. Traficacion di droga, arma y hende ta sigui y casi nada ta wordu hasi pa pone un paro na esaki. Nos tin un cuerpo policial chiquito y no bon equipa. Nos tin un plan cu lo proteha e ciudadano no solamente contra atracadornan y ladronan pero tambe contra un sistema inhusto den husticia.

#### **1. Nombramento di hueznan**

Nos kier hueznan cu ta comprende e cultura y normanan y balornan di Arruba. E sistema actual di nombra un huez no ta tene cuenta cu esaki. Pesey nos lo cambia e sistema con hueznan ta wordu nombra. Cada un huez mester wordu nombra pa Parlamento y lo wordu interviewed door di e comision di Husticia. Si e no pasa e interview aki e no por wordu nombra como huez. E mes un procedura aki mester conta pa nombra un Procurador Generaal.

#### **2. Priorizar casonan na Ministerio Publico**

Minister di Husticia mester duna instruccion na Ministerio Publico pa duna prioridad na casonan importante manera corrupcion, abuso di mucha y droga. Actualmente esey no ta e caso y mester bin cambio den esaki. Nos Minister di Husticia lo duna instruccion na Ministerio Publico pa duna prioridad na esakinan.

#### **3. Bin cu un corte pa casonan chiquito**

Mester bin cu un corte cu ta atende casonan chiquito na unda tin disputonan di sumanan di placa chiquito envolvi. Hopi biah ciudadanonan ta wordu tuma haci door di hende cu keda debe nan pero no ta bai corte pasobra e suma envolvi ta menos cu paga pa un abogado. Un corte separa cu por atende cu e casonan asina ta na beneficio di e ciudadano.

#### **4. Cambia castigonan maximo pa minimo**

Hueznan tin hopi libertad di determina e haltura di un castigo y hopi biah ta duna castigonan mucho abow pa actonan cruel. Nos lo cambia e castigonan maximo pa castigonan minimo.

#### **5. Baha atraconan**

Mester bin cu un radar sofistica pa combati traficacion di arma, droga y hende via di lama cu por capta botonan chiquito tambe. E facilidad cu arma y hende ta dreanta Aruba via di lama ta causa di e subimento di atraconan.

## **6. Bahia ladronicia**

Mayoria ladronicia ta wordu cometi door di drogaditonan cu a sali for di KIA. Unabez nan word kita for di caya bo ta nota un bahamento den ladronicia y joy riding. Mester bin cu e ley di curatela pa kita nan for di caya. Tambe esnan cu ta repeat offenders mester carga pa un periodo un enkelbank electronico pa asina por monitor nan movecion. Mester tambe involucra instancianan manera iglesianan pa bin cu un sistema di half way house pa vang nan op.

## **7. Mas polis mas respect**

Aruba no tin suficiente polis ariba caya. Hopi ta bai cu pensioen y no tin otro pa tuma nan lugar. E estudio di polis ta tuma mucho tempo. Nos lo introduci un verkorte opleiding pa polis di 14 luna pa esnan cu un estudio di HAVO of MBO. Di e forma aki nos por haya polis mas liher ariba caya. Reduci e cantidad di aña for di 4 pa 14 luna lo crea mas polis ariba corto tempo. Mas polis ariba caya lo baha ladronicia y tambe accidente di auto.

## **8. Mas equiponan moderno**

Technologia por yuda un polis den su trabow pero tambe por ta na beneficio di e ciudadano. Nos lo bin cu body camera y dashboard camera pa polis. Tambe autonan mester por tin equiponan pa por haya informacion di un vehiculo eynan mes. Por usa drone tambe pa facilita trabow. Camera ariba puntonan strategico tambe por yuda den trabow di polis. Un helicopter ta na su lugar.

## **9. Ayudo di e ciudadanonan**

Polis tin man yen. Kleine overtredingen casi no ta wordu atendi y pesey hende no ta tene cuenta cu leynan. Nos lo bin cu un programa pa stimula ciudadanonan di wak rond y avisa Ministerio publico cu prueba di kleine overtredingen cu segun ley tin un boet pe.

Ciudadanonan cu raporta tipo di crimen asina lo haya como recompensa un parti di e boet cu ministerio publico lo colecta. Di e forma aki orden ta wordu poni back na Aruba y ta duna polis menos trabow pa asina nan por atende cu casonan mas serio.

## **10. Sistema di amber alert**

Lo introduci un sistema di amber alert na unda ciudadanonan ta ricibi un signal cu ta pone nan na altura cu por ehempel un fugitivo ta ariba caya, un mucha ta perdi, un sospechoso peligroso ta gana rond etc. E signal aki lo interumpi transmision di television, radio y telefoon/cellular pa asina tur ciudadano wordu poni na altura.

## IMMIGRACION

### Vol is vol

Aruba ta sobrepopula y esaki ta consequencia di un maneho di immigracion hopi habri cu a permiti stranheronan drenta Aruba sin un control adecua. Nos mester sera nos fronteranan y cuminsa controla estrictamente ken ta drenta y sali na Aruba. E hecho cu e fronteranan ta hancho habri a causa entre otro 1. Sobre poblacion. 2. Un mercado laboral ineficiente na unda Arubianonan y local no por haya trabow. 3. Pata pata di ilegal como 15 mil cu ta causa cheap labor cu na su turno ta un menaza pa e trabow di e trahador y tambe ta causa cu e salario di e trahador no ta subi. 5. Aumento di criminalidad. 6. Gastonan pa gobierno di entre otro skol, caratera etc. 7. Gastonan pa e fondo di AOV y AZV. 8. Menos devisas. 9. Un identidad perdi si sigue asina ya cu sin cambio na 2030 lo tin mas stranhero cu Arubiano ariba Aruba. 10. Mas traficacion y explotacion di hende. Gobierno segun e Constitucion tin e deber di promove oportunidadhan pa terenonan pa vivienda y tambe pa proteha e mercado laboral local, y e seguridad nacional y nos identidad. Pa e razonan ey partido CURPA lo limita e immigracion lo mas hopi cu ta posibel. Partido CURPA lo hiba un maneho di stranheria y admicion hopi estricto y lo suma e medidanan necesario pa haci Aruba un pais menos atractivo pa esnan cu kier bin cu permiso di trabow. Tambe nos lo suma e medidanan necesario pa combati ilegalidad. Aruba ta vol y vol is vol y mester traha lugar pa Arubianonan regresa Aruba y tambe pa nos crecimiento turistico.

#### MERCADO LABORAL:

##### 1. Un paro di permiso di trabow pa 1 año

Nos lo bin cu un paro di inmediato di otorgamiento di permiso di trabow pa 1 año. Pa investiga e situacion di e mercado laboral local y determina e cantidad di desempleo y cuponan di trabow habri.

##### 2. Introduci un 70/30 regeling

Nos lo bin cu un 70/30 regeling cu ta stipula cu na cada neggoshi mester tin por lo menos 70% trahador local y 30% trahador cu permiso di trabow.

##### 3. Entrega 2 permiso pa haya 1 permiso

Pa baha e cantidad di permiso especialmente na negoshinan cu tin mas cu 30% trahador cu permiso lo bin cu un regla cu pa cada permiso cu wordu pidi e compania mester entrega 2 permiso. E maneho aki lo baha e cantidad di permiso di trabow cu tin actualmente ariba caya cu ta 44% di e mercado laboral y cu lo pasa 50% na 2018.

##### 4. Prioridad na Arubianonan

Prome cu por bin na remarce pa cualquier permiso di trabow e compania mester buska trahador local na un manera official y si no logra den esaki mester purba un intento na e vacaturebank di Arubahuis na Hulanda. Si ainda no logra mester duna preferencia na Antiyano prome y despues hulandes y por ultimo un candidato di otro pais.

**5. Publicacion annual di lista di companianan companianan cu ta cumpli**

Anualmente nos lo publica un lista y duna reconocimiento di e companianan cu ta cumpli cu e 70/30 regeling. Esaki lo stimula e compra di consumidornan local.

CAMBIONAN DEN BENEFICIONAN DI PERMISO PA TRABOW:

**6. Permiso di trabow pa maximo 3 aña**

Nos lo limita e cantidad di permisionan di trabou pa cada trahador na un maximo di 3 aña.

**7. Elimina gezinshereniging**

Nos lo elimina reunion familiar esta gezinshereniging pa trahadornan cu permiso di trabow.

**8. No mas AZV pa trahador cu permiso**

Trahadornan cu permiso di trabow no por haya cuido medico di AZV. Doñonan di trabow ta wordu obliga di segura nan trahadornan cu permiso den sector priva.

**9. No por bin na remarce pa pensioen AOV**

Trahadornan cu tin permiso di trabow no por bin na remarce pa haya den un pensioen di AOV den futuro. Nan lo contribui si na e fondo di AOV pa esnan cu actualmente ta cobra un pensioen.

**10. Reintroduci permiso di trabow pa esnan casa cu Arubiano**

Pa esnan cu ta casa cu Arubiano y cu no tin nacionalidad hulandes of firma liber cu overgangsregeling.

**11. Retraza of para e proceso di naturalizacion**

Nos lo wak e posibilidad di retraza of para e proceso di naturalizacion via di Aruba.

ILEGAL:

**12. Un periode di gracia di 2 luna pa ilegal**

Nos lo bin cu un campana di informa tur ilegal aki na Aruba cu nan tin 2 luna pa voluntariamente rapporta nan mes pa wordu deporta. Esnan cu no haci esaki y cu ta wordu gara despues di e 2 luna lo wordu deporta y declara persona non grato pa Aruba y lo no por bin Aruba mas tampoco como turista.

**13. Un radar sofistica**

Nos lo bin cu un radar sofistica cu lo capta movecion arriba lama y capta barconan chiquito.

**14. Boet halto pa sconde ilegal**

Nos lo inclui den e LUTV un boet halto na personanan y companianan cu ta facilita esnan cu ta ilegal na Aruba.

**15. Tiplijn pa ilegal**

Lo bin cu un tiplijn na unda personanan por rapporta ilegal of esnan cu ta facilita ilegal. Lo paga esnan cu a duna e tip cu un recompensa na momento cu e ilegal wordu deporta.

## **16. Ley pa identificacion**

Mester bin cu un ley na unda personanan ta obliga di cana cu un ID pa identifica nan mes si wordu puntra door di. Polis. Lo baha e prijs di ID pa tur hende por tin un ID. E ley aki por combati criminalidad tambe.

## **17. Cambia articulo 33 di LUTV**

Mester pone autoridad di detene personanan ilegal back den man di polis. Mester cambia e ley pa cu esaki.

## **18. Amplia e responsabilidad di e garantsteller**

E persona cu para garantia pa un persona su estadia na Aruba lo wordu pon financieramente responsabel pa tur daño cu e bishitante comete contra otro personanan y companianan.

## **19. Introduccion di un waarborgsom cu garantsteller tin cu paga**

Lo introduci un waarborgsom cu e garantsteller lo haña bek ora cu e turista regresa su pais promer cu e estadia di turista vence

## **20. Machine di fingerprint**

Lo introduci un machine di fingerprint na airport y waf pa registra tur hende cu drenta Aruba pa evita cu criminal ta drenta Aruba y tambe pa evita ilegal non grato bolbe drenta Aruba.

## **21. Digitalisacion di permiso di estadia turistico/temporada**

## **22. Introduccion di un sistema di altera na momento cu un permiso turistico vence pa asina duna boet**

## **23. Conecta e sistemanan di DIMAS, Immigracion y Censo pa regularmente controla entrada y salida.**

## **24. Reintroduci Visa pa cierto paisnan.**

## **25. No ta acepta refugiadonan pero mas bien lo facilita pa mandanan otro paisnan cu por accepta nan.**

Aruba a ricibi hopi immigrantenan pa decadanan largo pero na e momentonan aki nos no tin e capacidad mas y vol is vol. Nos maneho estricto lo percura cu nos tin un bon control di ken ta drenta y sali for di Aruba pa asina preveni problemanan den futuro.

## **SALUBRIDAD PUBLICO BO SALUD PROME**

Salubridad publico na Aruba ta laga hopi di deseas. Patient mester warda pa lunanan largo pa haya un cita cu un specialista, pa haci un test of un operacion. Un cita cu bo dokter di cas tambe ta tarda. Mandamento di patient pa exterior ta pa cierto patient un proceso largo y hopi biaha tin politikeria den esaki. E seguro di AZV no ta cubri hopi cos. Hopi patient ta fayece a causa di fout cu ta wordu haci door di dokter tin biaha fout kens. Gastonan di AZV ta halto y no tin un control manera mester ta ariba esakinan. Ta parce cu e salud di e patient no ta na prome lugar pero otro interesnan. Nos maneho lo haci cambio den esaki y lo pone bo salud na prome lugar.

### **1. Baha e tempo pa haya cita cu specialista**

Mester kibra e kartel di specialista y laga mas specialista drenta Aruba. Lo duna preferencia na specialista Arubiano y si esaki no ta posibel lo busca specialista cu lo bin Aruba pa un tempo defini. Mas specialista nos tin menos e tempo pa haya un cita.

### **2. Baha e tempo pa haya un cita cu dokter di cas**

Un patient mester por haya un cita cu su dokter di cas di biaha. Nos mester baha e cantidad di patient cu ta registra na un dokter di cas pa evita cu mester warda hopi pa haya un cita. Mester bin cu mas dokter di cas pa Aruba naturalmente dunando preferencia na dokter Arubiano prome. Tambe mester tin un cierto cantidad di dokter di cas cu ta bishita patient cu pa un of otro motibo no por bishita e dokter su mes.

### **3. Baha e tempo cu mester warda pa hasi test of operacion**

Ta ridiculo cu tin di warda pa haci cierto test of pa hasi un operacion. Esaki no por. Pa cuminsa mester exigi cu dokter di cas tin un minimo di cierto equiponan na nan practica cu por detecta si algo ta malo cu e patient. Por ehempel un machine di echo cu no mester warda 6 siman pa haya un cita pa hasi un simpel echo. Tambe nos mester habri e mercado pa tin competencia cu hospital pa loke ta trata servicionan di test y te hasta sala di operacion, por pensa aki ariba clinica medico cu por bin na remarca pa un tax holiday conforme nos maneho economico. Competencia ta bon y por hisa e calidad di servicio y baha e prijs tambe.

### **4. Pone dokter responsabel pa fout cometis**

Hopi fout ta wordu hasi door di dokter y nada ta wordu hasi. E patient mester haya mas derecho y un organo independiente mester investiga automaticamente cualquier caso di mal practica. Si un dokter comete mas cu 1 fout e mester wordu poni responsabel y prohibi di traha na Aruba ya cu no por hunga cu salud y bida di hende.

## **5. Un servicio di emergencia rapido**

Servicio di emergencia ta laga hopi di desea. Mester warda oranan pa por wordu yuda y hopi biaha si nan wordu yuda ta wordu manda cas bek pa despues fayece. Nos ta kere cu mester bin cu mas sala di emergencia ariba Aruba cu ta cai bow di AZV. Ta laga e mercado liber pa dokernan di cas bin cu e initiativo segun necesidad. E asina yama ‘urgent care center’ por yuda e patient mas rapido serca di nan cas y alavez por baha e gastonan pa un bishita.

## **6. Objetividad den manda patient pa exterior**

Ta wordu midi cu diferente midi ora mester manda patient pa tratamiento pa exterior. Tin patient ta wordu trata rapido y otro no siendo mes un tratamiento. Tin cierto patient ta wordu manda un cierto pais y otro un otro pais pa mes un tratamiento. E cosnan aki no por tur patient mester haya e mihor tratamiento disponibel y no mester tin discriminacion den esaki. Mester bin tambe cu un inspector cu ta atende su mes cu e calidad di servicio den exterior mirando cu hopi cos straño ta pasa den exterior cu patientnan. Mester bin mas transparencia.

## **7. Amplia e pakete di AZV**

Nos lo amplia e pakete di AZV cu:

1. Cubrimiento di tratamiento y remedio di tera legal produci na Aruba.
2. E opcion pa scohe entre remede generico of original
3. Cubrimiento di gastonan medico den exterior pa casonan acuut ora di haci un viaje personal
4. Cubrimiento di gastonan pa tratamiento experimental pa casonan cu no tin solucion.

## **8. Preveni pa no lamenta**

Lo bin cu un Health Tax ariba productonan cu no ta saludabel y lo kita e 2% di BAZV. Mester concientisa e pueblo cu un bida saludabel ta pa bo mes un bon y cu no por ta asina cu prima di AZV ta bai pa esnan cu tin un bida no saludabel. Nos lo kita tambe invoyerrechten ariba productonan saludabel.

## **9. Control di e gastonan door di e patient**

E patient por hunga un rol importante den control di e gastonan. Cada patient mester haya un prueba di bishita y ricibo di e gasto di e test, remedio y operacion. Na fin di año AZV lo manda cada patient un overzicht di e servicionan cu e patient a usa y e patient por controla si esaki ta correcto. Si e no ta correcto y mas a wordu cobra cu loke e patient tin na prueba e por rapporta esaki y un investigacion lo wordu hasi. E patient por wordu recompensa door di a rapporta e discrepancia.

## **ENSEÑANZA** **Mihor calidad y resultado**

Nos enseñanza ta laga hopi di desea. E calidad no ta bon y tampoco adapta na desaroyonan internacional. Studiantenan ta falta atencion y ora caba skol ta haya nan cu problema den nan estudio avansa. Nos mester haci cambionan structural den nos enseñanza pa asina adapta na e situacion di e estudiante y desaroyonan internacional. Mas skol, mas krijt y potlood no ta e solucion y nos ta kere cu menos placa bo por hisa e calidad di enseñanza.

### **1. Introduci horarionan flexibel na skol**

E estudiante mester por haya e oportunidad di scohe si nan kier sigui les parti mainta of atardi. Esaki tin diferente beneficionan pa e estudiante y tambe gobierno. Tin mucha ta funciona mihor mainta y otro atardi. E klas tambe lo bira mas chiquito di e forma aki na unda studiantenan ta haya mas atencion di e maestro. Tambe lo haci uso di e edificio di skol na su maximo y no tin necesidad pa gobierno traha mas edificio di skol. Naturalmente lo cuminsa cu un pilot study pa wak con e ta bai den practica pa despues implementa e structura nobo.

### **2. Tablet den klas**

Hopi skol rond di mundo ta usa tablet den klas. Bo por haya tur buki arriba un tablet cu ta significa menos placa pa e boekenfonds pa ambos banda y tambe menos cargamento di boeki pisa den tas. Pa gobierno tambe e gastonan di busca buki lo baha. Muchanan special tambe por integra den klas ja cu tin varios opcion arriba un tablet cu por yuda nan sigue les normaal. Door di introduci tablet den klas studiantenan ta mas up to date y prepara pa sigui despues nan estudio den exterior. Naturalmente lo cuminsa cu un pilot study prome cu implementa tablet den enseñanza.

### **3. Sistema pa evalua maestronan**

Maestronan mester por wordu evalua pa garantiza calidad. Resultado di un klas ta depende di e manera cu les ta wordu duna. Si e resultado di un klas ta malo tin algo robez cu e manera cu ta wordu duna les. A base di e resultadonan di klasnann por evalua si un maestro ta duna les bon of no y asina tin mas criteria objetivo pa cuminsa evalua maestronan.

### **4. Opcion pa home schooling**

Mayornan mester por haya e opcion pa nan yui haya les na cas. Estudionan ta mustra cu homeschooling ta hisa e calidad. Tambe pa muchanan special esaki ta un opcion atractivo y pa e grupo aki e mester wordu subsidia door di gobierno.

### **5. Introduci beca pa studiantenan**

Gobierno mester ofrece beca na studiantenan cu kier sigui un estudio special na unda tin un scarcidad den mercado laboral. Esaki lo bin cu exigencianan y conforme reglanan objetivo.

## **ASUNTONAN SOCIAAL Y LABOR**

### **Oportunidad y progreso**

Varios gruponan den nos comunidad mester haya mas atencion y oportunidad pa bai dilanti den bida y tin un calidad di bida bon mereci. Tur hende no obstante nan situacion tin talentonan y mester tin e oportunidad di hasi uso di e potencial aki. Mester yuda esnan pober sali for di e spiraal di pobreza pa asina nan tin un perspectiva nan dilanti. Nos grandinan cu a hasi sacrificio den bida pa Aruba ta na unda e ta awe mester haya e atencion y danki mereci. Esnan cu limitacion fisico mester haya mas oportunidad y tin un calidad di bida mehor. E mercado laboral mester ta proteha y salarionan mester subi sin cu mester di hisa e minimumloon. Si nos situacion social y labor drecha na Aruba nos lo tin un comunidad feliz cu menos problemanan social y menos criminalidad.

#### **1. No mas pobreza**

Un gran parti di e pueblo ta pober. Hopi ta biba bou di e liña di pobreza cu en generaal ta 70% di e salario minimo. Nos lo hisa tur ayudo social por lo menos na e suma di 70% di e salario minimo pa asina Aruba oficialmente no conoce pobreza.

#### **2. Nos grandinan**

Nos grandinan lo haya hopi atencion y beneficionan bon mereci. 1. Lo introduci un sistema di taxi Comparti (deeltaxi) subsidia parcialmente door di gobierno. 2. Nos grandinan lo no paga impuesto di salida mas na Airport. 3. Nos grandinan cu tin pensioen di trabou solamente lo paga e werknemersbijdrage di AZV. 4. Nos lo baha edad di pensioen di 65 pa 60 aña. 5. Lo stimula trahamento di cas pa anciano via mercado liber cu lo mester cumpli cu reglanan di bon cuido. Casnan pa ancianonan actual cu no ta cumpli cu reglanan di bon cuido lo wordu sera. 6. Nos grandinan lo haya prioridad den cuido medico. 7. Mas subsidia pa instancianmanera kibrahacha y Cas Marie pa asina tin mas actividad pa nos grandinan.

#### **3. Mas beneficionan pa nos hendenan cu limitacion fisico**

Ningun hende kier ta den e posicion di tin un limitacion fisico y nos mester hisa e calidad di bida di esnan cu pa un of otro motibo ta haya nan mes den e situacion aki. Nos lo: 1. Hisa e bijstand di handicap pa salario minimo. 2. Pa esnan cu limitacion fisico e sistema di taxi Comparti lo ta gratis. 3. Esnan cu limitacion fisico tampoco lo mester paga impuesto di salida di Airport. 4. Bin cu reglanan pa negoshi pa haci nan negoshi mas accesible pa esnan cu limitacion fisico. 5. Subsidia homescholing pa muchanan special. 6. Mas subsidio pa organizacionnan cu ta yuda esnan cu limitacion fisico.

#### **4. Problemanan social**

Problemanan social tin di haber cu problemanan spiritual. Mester envolvi mas iglesianan pa resolve e tipo di problemanan aki. Entre otro duna nan mas acceso pa drenta prison. Nos hobenan den problema mester haya mas attencion y mester bin cu mas actividad pa nan den oranan liber door di entre otro renoba centro di barrio y hasi esakinan accesible pa hobenan, rehabilacion pa hobenan problematico y bin bek cu fundacion desaroyo educacion communitario (FDEC). Tambe lo mester bin cu mas programa pa evita embarazo hubenil.

## **5. Un ley laboral flexibel**

Cada trahador tin e derecho di traha cuanto ora cu nan kier. No ta tarea di gobierno di mete den e cantidad di ora cu un trahador kier traha. Si e kier traha mas ora e mester por haci esaki y nos lo cambia e leynan di tal forma cu e trahador ta dicidi cuanto ora e ta traha.

## **6. Reintegra bijstandstrekkers, ex preso y esnan cu limitacion fisico den mercado laboral**

Partido CURPA lo bin cu incentivos pa negoshinan cu tuma den servicio hendenan cu ta pa largo tempo den bijstand, ex presonan y esnan cu un limitacion fisico. Nos ta kere cu e gruponan di personanan aki lo ta bon trahadornan pa e doño di trabow sin nan haña e opurtunidad.

## **7. Amplia cursonan pa Enseñanza di Empleo**

Mas cursonan pa ofishi specifico di corto tempo na unda tin un necesidad den e mercado laboral.

## **8. Crea mas chance pa haya trabow pa bijstandtrekkers**

Mester hisa e perspectiva pa un cobrador di onderstand (bijstandstrekker) haya mas liher cu ta posibel un trabow. Gobierno lo bin cu un sistema na unda bijstandtrekkers por wordu ofrece un trabow temporal na un instancia of compania pa asina no perde e contacto social y keda activo cu un trabow. Esakinan lo hisa e posibilidad cu un bijstandtrekker por haya un trabow regular mas liher. Di otro banda governo por haya placa pa cubri parti di e gastonan di bijstand.

## **OBRANAN PUBLICO**

### **Synergia y ordo**

Partido CURPA lo pone atencion ariba San Nicolaas pa loke ta su desaroyo infrastructural. Den e Mega proyecto San Nicolaas and beyond nos lo crea un proyecto infrastructural cu ta sali di San Nicolaas te cu Faro Blanco. Un proyecto cu lo trece desaroyo economico cune y cu te hasta por wordu mira como e tercer pilar economico. E Mega proyecto lo wordu financia via di un Public Private Partnership (PPP). Un PPP di berdad y no loke tin awor cu mas bien ta un contrato di lease of fiansa na banco. Den un proyecto infrastructural di PPP di berdad bo ta lanta conhumentante cu stakeholders un N.V. Na unda cada partner lo inverti placa pa desaroya un proyecto infrastructural. Den e caso di e Mega proyecto San Nicolaas and beyond gobierno lo participa cu maximo di 40% den e N.V. Unabez e proyecto keda cla entrada lo drenta pa e N.V. Na unda cu e diferente stakeholders por haya nan dividendo. E construccion aki ta e berdadero significacion di un proyecto PPP.

#### **1. Mega proyecto San Nicolaas and beyond**

E Mega proyecto San Nicolaas and beyond lo consisti di lo siguiente. 1. Un teriferico for di Colony te cu Faro Blanco (via Noordkust) cu un paro na Arikok. Esaki lo bira un atraccion turistico grandi cu lo stimula e economia di San Nicolas tambe. 2. Mudamento di algun cruise ships pa San Nicolaas. Esaki lo stimula e economia den 1 luna di tempo y pone San Nicolaas ariba mapa internacional di cruise ship itenarry. 3. Construccion di un planta di recycling cu lo recycle e sushi grof di Aruba den otro producto of exportacion. 4. Construccion di 3 tanki pa wanta awa cu lo wordu importa for di Colombia pa wordu usa pa plantacion segun nos plan di agricultura. 5. Un servicio di Ferry di pasahero y cargo (no auto).

#### **2. No mas permiso pa traha hotel y condeminium**

Lo no duna permiso mas pa construccion di hotel y condeminium

#### **3. Dunamento di tereno segun prioridad**

Lo cambia e reglanan pa duna terreno erfpacht. 1. Lo duna preferencia na Arubianonan naci na Aruba. 2. Prioridad na esnan cu tin mas tempo inscribi. 3. esnan cu nacionalidad Hulandes y 4. Esnan sin nacionalidad Hulandes no ta bin na remarca pa terreno erfpacht.

#### **4. Mas zebrapad**

Nos lo pone mas zebrapad especialmente na tur skina di tur rotonde. Hopi hende a perde nan bida pa motibo di kier a cruza na un rotonde.

#### **5. Mas terreno pa agricultura**

Lo duna mas huurterrein pa hasi agricultura of remede di tera legal. Huurterrein actual cu no ta wordu usa pa agricultura lo wordu tuma back.

## **6. Recohe sushi grof na cas**

Fuera di e servicio di recohe sushi di cas Serlimr lo busca 1 biaha pa siman sushi grof tambe. E sushi grof lo wordu entrega/bendi cu e planta di recycling na San Nicolaas.

## **7. Reglanan pa area residential**

Mester wak e posibilidad pa bin cu reglanan pa area residential. Actividad economico no mester tuma lugar den area residential y tambe area residential mester mantene nan mes na reglanan cu lo percura cu un area residencial ta keda netjes.

## **8. Regula fluho di awa para**

Varios bario tin problema cu awa ora awa cero yobe. En coperacion cu Hulanda lo construi na diferente caminda unda e awa ta keda para molinanan cu ta saca e awa y manda esaki pa lama. E molinanan por fungi tambe como atraccion turistico.

## **MEDIO AMBIENTE**

### **Conserva naturalesa y reduci sushidad**

Mas y mas Aruba ta perde naturalesa. Construccion tur caminda y otorgamento di tereno pa loco pa fabor politico. Si sigui asina no ta keda mucho mas naturalesa cu no ta Arikok. Dump ilegal tambe ta sigue destrui nos naturaleza y nos dump actual ta un peliger pa nos salud y naturaliza. Aruba tin ainda sushidad di tur sorto ariba tera y den lama. Partido CURPA kier un naturalesa balancia pasobra si nos sigui horta for di naturalesa ta yega un dia cu naturalesa ta bin cobra bek loke nos a kita for di dje y nos tin di preveni esaki.

#### **1. Para creacion di dump ilegal**

Tin como 35 dump ilegal na Aruba. Un dump ilegal ta wordu crea door di hendenan y companianan cu ta saca santo y graniel pa bende. Proyectoran grandi manera green corridor, hospital, Watty Vos Blvd y hotel ta rekeri hopi pero hopi santo y graniel y terenonan ta wordu coba pa saca e santo y graniel pa wordu bendi. Partido CURPA no lo permiti esaki mas y lo prohibi cobamento di tereno pa saca santo y graniel na cantidad grandi. Proyectoran grandi cu mester di hopi santo y graniel lo mester importa esaki for di exterior. Tambe lo pone esnan cu ta coba tera paga pa pone un dump ilegal back na su estado origin.

#### **2. Dump Parkietenbos**

Nos lo sera e dump di Parkietenbos cu ta procesa tur tipo di sushi. E sushi accumula lo wordu exporta pa islanan cu tin e facilidad pa procesa e sushi.

#### **3. Sepera sushi di cas y sushi grof**

Nos lo bin cu un maneho pa separa e sushi di cas for di e sushi grof. Un planta lo procesa e sushi di cas y nos lo hasi un destache publico pa bin cu un planta di recycling na San Nicolaas cu lo procesa e sushi grof manera bleki, boter, hero, palo etc. Serlimar lo bin busca na tur cas na Aruba 1 baha pa siman fuera di e sushi di cas e sushi grof tambe. E por bira asina cu prome cu e sushi grof wordu busca otronan por pasa colecta cierto cosnan cu por wordu re usa. E planta di recycling por procesa e suhi grof y traha otro productonan di esey of export esakinan.

#### **4. Introduccion di statiegeld ariba bleki y boter**

Lo bin cu un statiegeld ariba bleki y boter. Ora e cliente hiba e boter of bleki back na su lugar di preferencia e lo haya su statiegeld back. E negoshi na su turno lo entrega esaki na e planta di recycling. Di e forma aki Aruba lo bira mas limpi y e productonan por wordu recycled.

#### **5. No mas permiso pa traha hotel y condominium**

Lo bin cu un moratorium pa trahamento di hotel y condominium. Mas naturalsesa ta bai na proyectoran asina y esaki mester stop.

## **6. Bahá impuesto ariba auto electrico y LPG**

Lo bahá impuesto esta ivoerrechten ariba auto electrico y auto LPG (gas). Ambos tin un efecto positivo grandi ariba medio ambiente.

## **7. Energia alternativa saludabel**

Windmolen ta malo pa salud y ta tuma hopi espacio. Zonnepanellen ta bunita pero caro y ta solamente esnan cu placa ta disfruta di dje. Nos lo kier wak e posibilidad di crea corriente cu e olanan di lama pa Noord di Aruba. E technologia aki ta limpi y por reduci e prijs di corriente tambe.

## **8. Leynan pa proteha nos flora y fauna**

Nos mester proteha nos flora y fauna y nos lo bin cu un ley cu lo proteha cierto matanan y fauna denlama. Lo no duna mas permiso pa watersport tambe.

## **TRANSPORTE**

### **Mas opcion y mas barata**

Transporte den Aruba y for di Aruba ta caro y no tin mucho opcion. Hopi ciudadano no tin transporte pa motibonan personal y otronan no tin placa pa paga pa transporte. Fuera di Aruba prijsnan pa viaha pa exterior ta hopi caro compara cu otro paisnan. Nos plan di transporte lo ta uno cu lo hasi transporte accessible y na un bon prijs pa un y tur y ta contene lo siguiente.

#### **1. Nos lo bin cu un aeroliña nacional**

Den pasado nos conoce Air Aruba, Tierra Air y awor Aruba airways. Tur ta pretende di ta e aeroliña nacional pero tur a fracasa pa emotibo di mal maneho, corrupcion y propietarionan Venezolano. Nos mester sinja nos les di esey y lanta nos propio aeroliña Nacional na unda e shareholders no ta di Venezuela y na unda gobierno tin un minoria. Cu nos propio aeroliña prijsnan lo baha y strategic alliance por wordu crea. Nos propio aeroliña mester ta den forma di un PPP na unda stakeholders interesa lo inverti den e compania.

#### **2. No mas permiso pa taxi y autobus**

Nos no lo otorga mas permiso pa taxi y autobus. Tin suficiente y mester stop cu e patronaje politico di una permiso pa fabor politico.

#### **3. Sistema di taxi comparti (deel taxi)**

Nos lo cuminisa di introduci un sistema di taxi comparti pa esnan ariba 60 aña y esnan cu tin un limitacion fisico y cu no por corre auto. Gobierno lo subsidia un parti di e viahe. E sistema aki lo cream as actividad economico ya cu hopi biaha taxi ta keda para pa basta tempo pa haya biahe. Taxi por haya mas trabow den oranan cu ta keto y esnan cu mester di transporte pa hasi nan diligencia por hasi usa di e sistema di taxi comparti. Win win win pa e taxi, cliente y economia.

#### **4. Servicio di ferry**

Manera nos a pone den nos plan na 2009 nos kier bin cu un servicio di ferry. Esaki lo ta limita na pasehero y cargo y no auto. Den nos plan original esaki lo a Sali for di Barcadera pero awor nos lo Sali e ferry for di San Nicolaas creando asina mas actividad pa e pueblo di San Nicolaas. Un servicio di ferry lo baha e prijs di transporte cu avion.

#### **5. Baha impuesta di salida**

E impuesto di salida pa vianen den Reino hulandes lo baha pa \$20 pa ciudadanonan di Aruba. Pa esnan ariba 60 aña y personanan cu limitacion fisico no lo paga impuesto di salida pa cualquier viahe pa cualquier destinacion.

#### **6. Boet pa retrazo di avion**

Si tin un retrazo di mas cu 3 ora e aerolina lo tin di paga un boet na e pasahero.

## **TELECOMMUNICATION Y MEDIA ACCESIBILIDAD, BERDAD Y DECENCIA**

Telecommunicacion ta caro y no accesible pa tur hende. Pa loke ta trata corant, radio, tv y social media hopi di nan ta instiga e pueblo y duna informacion cu no ta correcto. Nos ta pro libertad di expresion pero na e momento aki hopi insulto y palabra malo ta wordu papia ariba nos media di communicacion.

Ban pone telecommunicacion accessible y decencia den media back na Aruba.

### **1. Internet gratis ariba speed di 2G ariba henter Aruba**

Internet ta un media di communicacion hopi importante y mester ta accessible pa tur hende. Nos lo introduci internet accessible pa telefoon cellular cu speed di 2G ariba henter Aruba. Aunke e speed no ta liher e pueblo por tin acceso na su email, web browsing y social media. Hopi pais den mundo ta ofrece esaki caba y ta bira tempo cu Aruba tambe ta ofrece esaki.

### **2. Moratorium ariba radio y corant**

Aruba ta un isla chiquito y ya caba tin monton di radio y corant. Nos lo pone un moratorium pa dunamento di permiso pa lanta un radio of bin cu un corant.

### **3. Decencia den media**

No tin decencia den media manera radio, corant y social media. Nos ta kere den expresion di libertad di papia pero e no mester bai cu palabranan malo y insulta. Pesey DTZ lo wordu instrui di monitor tur programma di radio y tambe contenido di corant. Si no tin decencia e radio of corant lo perde nan permiso. Tambe lo bin cu ley pa pone decencia ariba social media y lo persigui esnan cu insulta hende ariba internet. E pueblo tambe por manda un tape graba pa DTZ cu ta wordu obliga di duna boet na radio y si ta sigue te hasta kita permiso di e radio.

### **4. Mas programma educativo**

Un pueblo mester wordu informa. Tele Aruba e canal di television di pueblo mester mester tin programman informativo pa e pueblo. Pa tur categoria di edad.

### **5. Tele Aruba N.V.**

Tele Aruba mester bai back pa un N.V. y mester wordu saca for di Setar. Mester produci mas programma profesional local y traha hunto cu otro islanan den un strategic alliance pa ofrece mas programmanan cu ta na agrado di e pueblo televidente. Ban haci Tele Aruba e canal di pueblo.

## **AGRICULTURA, PESCA Y CRIA DI BESTIA**

### **Nos mesun cuminda**

**Aruba ta depende mucho ariba cuminda for di exterior. Nos mester sali for di e dependencia aki y cuminsa produci mas nos mes un cuminda. Pesey nos lo stimula plantacion di berdura y fruta, habri e mercado di pesca y cuminsa cria mas bestia pa asina nos tin nos mes un cuminda.**

#### **1. Stimula propio agricultura rond di Aruba**

Aruba tin hopi huurterreinen cu destino agricultura cu no ta wordu usa pa e meta ey. Nos mester cuminsa tuma e terenonan ey bek den beslag y cuminsa hasi agricultura di berdura y fruta. Pa hasi esaki posibel lo bin cu awa natural for di Colombia cu tankero. Sin awa no por planta. Tambe ta importante pa educa e muchanan for di tempran di e importancia di agricultura y lo bin un les special pa cu esaki na skolnan na unda cada skol tin su propio greenhouse. Tambe nos lo duna educacion na esnan interesa di cuminsa un jardin di berdura y fruta na cas y lo bin cu incentiva pa cu esaki.

#### **2. Habri e mercado di pesca na Aruba**

Nos lo kita tur restriccion pa pisca y tur forma di pesca lo ta permiti manera canasta. Lo duna subsidio pa medio di belasting na esnan cu kier bira un piscador. Tambe mester wak e posibilidad di bin cu un barco grandi di pisca y asina crea un centro di pesca cu e posibilidad pa exportacion. Aruba mester di mas pisca na un prijs razonable. Pisca ta saludabel tambe pa come.

#### **3. Cria di bestia pa nos mes un carni**

Huurterrein cu destino pa cria di bestia y cu no ta wordu usa pa esey mester wordu tuma bek. Mester prepara e terenonan pa cria di bestia contra cacho y otro bestianan cu ta un peliger. Lo mester importa bestianan pa cuminsa e proceso di multiplica rapido. Tambe lo mester expande e abattoir pa asina mas bestia por wordu procesa. En combinacion cu agricultura e bestianan por haya nan cuminda y alabez e tereno lo wordu fertiliza automaticamente door di e mes un bestianan cu ta come restu di e cosecha.

Nos ta kere cu ta hopi importante pa Aruba tin su mes un cumindanan y no depende di otro paisnan. Cu nos plan nos lo produci nos mesun cuminda pa nos poblacion na un prijs mas barata y organico y saludabel.

## IMUESTO Mas placa den cartera

Nos tin un sistema di impuesto antiqua y esun mas halto den mundo. Un sistema asina ta caba cu e clase media y ta stroba desaroyo economico di negoshinan chiquito. Pa stimula e economia nos mester cambia nos sistema di impuesto for di uno progresivo pa uno di 3 tarifa. Mester hasi tambe algun cambionann den e sistema di ricibi placa bek di belasting cu actualmente ta uno inhusto y mester hasi cambionan den nos sistema di invoerrechten pa asina stimula cierto compranan di productonan.

### **1. Un sistema nobo di belasting di 3 tarifa**

E sistema actual ta stroba desaroyo economico y ta stroba e poder di compra pa subi. Nos lo cambia e sistema for di uno progresivo pa uno di 3 tarifa simplificando asina e sistema di belasting pa asina stimula e economia y poder di compra di e ciudadano. Nos 3 tarifa lo ta: pa entradanan te cu 35 mil florin pa aña 5%. Pa entradanan entre 35 mil y 75 mil 15% y pa entradanan ariba 75 mil 30%. Den e tabel aki bow tin algun ehempel na unda bo por mira cuanto placa di belasting bo lo scapa den nos sistema di 3 tarifa pa asina bo resta mas placa den bo cartera.

Den Afl.

| <b><u>Entrada</u></b> | <b><u>Actual T1</u></b> | <b><u>Actual T2</u></b> | <b><u>Nos sistema</u></b> | <b><u>Bo ta resta</u></b>      |
|-----------------------|-------------------------|-------------------------|---------------------------|--------------------------------|
| 25.000                | 318                     | 338                     | <b><u>227</u></b>         | <b><u>81 pa 111</u></b>        |
| 30.000                | 725                     | 765                     | <b><u>477</u></b>         | <b><u>248 pa 288</u></b>       |
| 35.000                | 1.202                   | 1.268                   | <b><u>727</u></b>         | <b><u>475 pa 541</u></b>       |
| 40.000                | 1.778                   | 1.875                   | <b><u>1.477</u></b>       | <b><u>301 pa 398</u></b>       |
| 50.000                | 3.304                   | 3.379                   | <b><u>2.977</u></b>       | <b><u>327 pa 402</u></b>       |
| 60.000                | 5.004                   | 5.279                   | <b><u>4.079</u></b>       | <b><u>927 pa 1202</u></b>      |
| 75.000                | 8.456                   | 8.921                   | <b><u>6.327</u></b>       | <b><u>2.129 pa 2.594</u></b>   |
| 100.000               | 16.137                  | 17.024                  | <b><u>13.827</u></b>      | <b><u>2.310 pa 3.197</u></b>   |
| 250.000               | 83.987                  | 88.162                  | <b><u>58.827</u></b>      | <b><u>25.160 pa 29.335</u></b> |

Bo por conta quanto belasting bo tin di paga segun e sistema di CURPA ariba e siguiente manera. 1. Si bo entrada ta 35 mil of menos kita e belastingvrije voet di 20.455 y calcula 5% di e suma cu resta esey lo ta loke bo tin di paga na belasting (maximo di 327 florin). 2. Si bo entrada ta entre 35 mil y 75 mil bo lo paga pa e prome 35 mil 327 florin mas 15% di e suma cu a keda ariba 35 mil pero te cu 75 mil (maximo di 6 mmmil florin). 3. Si bo entrada ta mas cu 75 mil bo lo paga e maximo di e prome tarifa cu ta 327 florin mas e maximo di tarifa 2 cu ta 6.000 florin y mas 30% di e suma cu ta ariba 75 mil. Cu e sistema aki e poder di compra di e ciudadano lo subi y e negoshi chiquito tin mas placa disponibel pa inverti den nan negoshi. Ambos lo stimula e economia.

## **2. Restitucion di belasting rapido y husto**

No por ta asina cu belasting ta cobra bo interes y te hasta manda deurwaarder ariba bo ora bo debe nan placa. E pagador di belasting tambe. Mester por haya su placa rapido y si esey no ta e caso e mester wordu paga un interes pa cada luna cu e no haya su placa back. Nos lo pone den ley cu gobierno ta obliga di paga e pagador di belasting den 3 luna despues cu entrega e aangifte su restitucion bek. Si alcaso e no cumpli gobierno lo mester paga interes na e pagador di belasting.

## **3. Automatiza aangifte di belasting**

Lo bai automatiza e sistema di entrega di bo aangifte. Por bai hasi esaki via di internet y por paga tambe via di internet si acaso mester paga.

## **4. BBO y BAZV**

BBO ta un sistema accumalativo y te hasta por ta 12%. Nos lo cambia e sistema aki di uno accumulativo pa un flat BBO di 5%. Lo elimina e BAZV di 2%.

## **5. Invoerrechten y accijns**

Pa stimula technologia lo kita e invoerrechten di 12.5% ariba computers. Tambe lo elimina invoerrechten ariba productonan cu ta saludabel. Di otro banda lo bin cu un health tax ariba productonan cu ta malo pa salud.

## **EDAD DI PENSIOEN**

### **Scohe bo edad**

Actualmente gobierno a hisa e edad di pensioen pa 65 año. Mal maneho di varios gobiernonan cu no a entrega e primanan di pensioen na e fondonan y mal inversion di e fondonan den entre otro Stanford bank a pone cu e fondonan a cai den problema. Pensioen di AOV ta basa ariba e principio cu esnan cu ta traha awe ta cubri e gastonan di pensioen di esnan cu ta cobra pensioen awe. Mas hende traha mas placa ta drenta den e fondo. E maneho economico di CURPA lo percura cu mas cuponan di trabow ta wordu crea pa asina mas placa drenta den e fondonan. Limita e derecho pa pensioen AOV pa esnan cu nacionalidad Hulandes lo baha tambe e gastonan di pensioen. Cada persona mester evalua pa su mes si e kier bai cu pensioen cu 60 of 65 año. Cada persona tin nan motibonan pa scohe un of e otro y mester haya e libertad ey.

#### **1. Baha edad di pensioen pa 60 año**

Nos lo baha e edad di pensioen pa 60 año ariba e siguiente manera. Ora yega e edad di 60 año bo ta haya e opcion di scohe si bo kier bai cu pensioen cu 60 año of cu 65 año. Si e persona scohe pa bai cu pensioen cu 60 año e no por busca un otro trabow te ora e yega 65 año. Di e forma aki cuponan di trabow lo habri pa otronan cu no tin 60 año. Si e persona scohe pa no bai cu pensioen cu 60 año pero cu 65 año e por haci esaki libramente. E persona tin e libertad di scohe dependiendo su situacion si e kier bai cu pensioen cu 60 of 65 año.

#### **2. Individualiza pago di pensioen**

Gobierno a bin cu e medida grandi di individualiza e prima di pensioen na unda cu cada persona den un pareha ta paga prima di pensioen AOV cu antes solamente 1 persona tawata paga. Gobierno a individualiza e prima di pensioen pero NO a individualiza e pago di pensioen AOV. Esaki ta significa cu un pareha ta haya menos placa na pensioen si cada un lo a haya un pensioen individual. Nos lo hasi cambio den esaki y si bo ta un pareha casa cada un lo cobra e pensioen separa cu hunto lo sali mas o menos Afl. 2.300 florin pa luna enbez di Afl. 1.800 florin pa luna. Esaki lo ta un adelanto di mas o menos Afl. 500 florin pa luna pa un pareha casa. Si individualiza e prima di pensioen mester individualiza e pago di pensioen tambe.

#### **3. Pensioen AOV solamente pa esnan cu nacionalidad Hulandes**

Derecho ariba pago di pensioen AOV solamente lo ta pa esnan cu nacionalidad Hulandes. Esnan cu no tin e nacionalidad Hulandes lo sigui aporta den e fondo di AOV via nan trabow pasobra ta esnan cu ta traha ta paga pa esnan cu ta cobra pensioen AOV. E sistema aki lo baha e gastonan di AOV.

Cu e maneho menciona aki riba nos por baha e edad di pension ariba un manera responsabel sin trece e fondo di pensioen na peliger. Mas cuponan di trabow cu nos lo crea y salarionan minimo cu lo subi tambe lo trece mas placa aden den e fondo di pensioen.

## **DEPORTE** **Aruba isla deportivo**

Mester introduci mas actividad deportivo na Aruba ariba tur nivel. Aruba mester bira un isla deportivo. Nos muchanan mester wordu involvi den deporte for di tempran y deporte mester bira te hasta un trabow na unda bo ta haya e oportunidad di desaroya bo talentonan deportivo ariba un nivel proffesional. Mas deporte y mas moveccion ariba Aruba ta bon pa e salud di un pueblo. Placa di Lotto di deporte mester bai en completo pa realiza di Aruba un isla deportivo.

1. Elimina HUUR di FFD (Stadionnan di Aruba)
2. Pone tur luz di canchanan deportivo riba STRAAT VERLICHTING
3. Elimina Eigenbijdrage pa atleta di seleccion ARUBA
4. Elimina Alcohol na terenongan deportivo bao di 18 anja
5. Coaches nan deportivo lo risibi INCENTIVO pa nan trabao
6. Stimula Media Deportivo pa cubri e deporte Total
7. Plan di Mercadeo pa Deporte en general di Aruba
8. Desaroya DEPORTE ESCOLAR cu competencia entre nan
9. Trahador di gobierno cu ta coach un team lo risibi 6 ora cu pago pa inverti den siman pa train e muchanan e deporte
10. Traha un Centro di Desaroyo pa capacita tur coaches den nan ramo di Deporte
11. Drecha tur facilidadnan deportivo na Aruba
12. Traha Facilidad, Edificio pa Bowling, Biljard, Weightlifting, y otro nan den necesidad
13. Traha kleed kamers na tur veld na Aruba
14. Traha riba TURISMO DEPORTIVO, door di trese na Aruba hopi competencia internacional
15. Trece competencia intergubernamental den tur deporte
16. Incentiva commercio pa inverti directamente den deporte
17. Hasi DEPORTE DEN BARIO un PRIORIDAD
18. CENTRO DI BARIO super ACTIVO den deporte
19. Trese un dia nacional di deporte “ARUBA DEN DEPORTE”
20. SPECIAL OLYMPICS
21. Crea un Website General di “Ministerio di Deporte Arubano”
22. Pone Aruba den Movecion 80+, 70+, 60+, 50+, 40+
23. Pone Lotto pa Deporte bek pa Deporte
24. Balansa Top Sporter y Educacion / Elimina Blijven Zitten pa e Top Sporternan
25. Atletanan di ALTO RENDIMIENTO lo risibi support financiero di Ministerio di Deporte.

## **NORMANAN Y BALORNANN**

### **Bendicion no maldicion**

No ta un secreto cu partido CURPA ta un partido Cristian cu kier conserva normanan y balornan Cristian den comunidad pasobra haciendo esaki Aruba lo risibi bendicion y proteccion di Dios. E a funciona den pasado y si sigui conserva nan e lo funciona pa futuro tambe. Sociedad no por bira un free for all na unda reglanan, normanan y balornan ta wordu hala un banda pa motibonan cu kier legaliza un cierto estilo di bida of actitud. Mester trek e grens un caminda pa tin ordo den sociedad. Si mester tene cuenta cu deseongan di tur grupo esey no ta posibel.

#### **1. Codigo Civil y Amienda 7**

E codigo Civil nobo tin hopi cos robez. Mester adapta esaki na normanan y balornan di e instituto di famia manera nos a conoce pa hopi tempo. E amienda 7 cu ta duna parehanan homosexual y heterosexual e mesun derechonan cu un pareja heterosexual casa y te hasta mas no por wordu implementa na Aruba. Partido CURPA lo no permiti e amienda 7 bira un ley y percura cu den futuro esaki nunca hamas por bira un ley. Parehanan homosexual por regla nan asuntonan via di notaris. E amienda 7 manera e ta awor ta igual na un matrimonio heterosexual mirando cu e proceduranan den e amienda 7 ta igual cu e proceduraron pa casa y tin mes un proteccion y debernan cu un pareja hetero casa. No tin un diferencia entre amienda 7 y casamento pa raad.

#### **2. Euthanasia**

Nos lo no permiti ningun forma di euthanasia na Aruba.

#### **3. No mas abortus**

Abortus mester keda ilegal. Nos lo persigue cualquier dokter cu ta hasi abortus cu excepcion si e mama y baby perde nan bida. Nan lo mester paga un boet halto y te hasta por bai sera den prison. Tur placa di belasting cu ta bai pa fundacionnan cu ta propaganda abortus lo wordu para.

#### **4. No na cannabis**

Nos no lo permiti cannabis sea como medicina of recreacional wordu legaliza. E lo keda un droga ilegal.

#### **5. Alcohol**

Lo bin cu mas reglanan estricto pa limita uso di alcohol. Fuera di un health tax lo 1. Boet negoshinan cu ta bende y sirbi alcohol na muchanan menor di edad. 2. No tin benta di alcohol ariba diadomingo te cu 12PM den supermarket . 3. Doñonan di establecimiento ta haya boet halto y ta wordu poni responsabel si nan laga nan clientenan sali for di nan lugar cu bebita alcoholic. E bebita alcoholico mester ta den bahul di auto. 5. Lo baha e limiet di alcohol den curpa pa automobilistanan.

## **RESUMEN**

### **Un Aruba Nobo**

E solucionan presenta den e programa aki lo salba Aruba for di rand di abismo y crea un Aruba nobo na unda lo tin husticia, ordo, prosperidad y normanan y balornan Cristian pa asina e pueblo por biba den felisidad, paz y harmonia cu otro cu e proteccion y bendicion di Dios.

#### **DEBE:**

Nos lo baha e debe monstroso cu gobiernonan anterior a crea anto SIN bin cu medida. Nos lo balancia e presupuesto na 2018 y negocia cu e fiadornan condicionan mas favorabel y un kwijtschelding parcial pa asina despues consolida e debenan den 1 solo debe na un interest mas abow. Nos lo baha e gastonan di gobierno pa loke ta trata viahenan di politiconan, huurmento di edificio y servicionan di consultant. Sin kita hende nos lo baha e gastonan di e aparatu gubernental door di entre otro baha e cantidad di minister di 9 pa 7, limita e cantidad di coordinador pa cada minister na 14, saca nombramento y promocion for di man di minister y independiza y automatisa cierto tareanan. Sin bin cu medida nos lo trece mas placa den e caha di gobierno door di entre otro e pilar economico nobo di remedi di tera, mas loonbelasting door di mas cuponan di trabow y salarionan mas halto door di sera e fronteronan y mas entrada di dividendo y 70 Miyon di Tourism levy cu mester bai den caha di gobierno.

#### **ECONOMIA:**

Nos lo stimula e economia cu na su turno lo crea cuponan di trabow. E pilar economico nobo di remede di tera lo crea cuponan di trabow y entrada pa gobierno. Nos lo baha e impuesto di ganashi pa 15% esaki lo stimula companianan pa inverti mas placa den nan compania. Un sistema nobo di belasting di 3 tarifa lo pone mas placa den e cartera di e ciudadano subiendo asina su poder di compra cu na su turno lo stimula e economia. Lo stimula exportacion y nos lo introduci un impuesto di ganashi di 7.5% pa bentanan hasi via di E-commerce. Lo bin back cu un tax holiday pa companianan nobo cu inverti un cierto suma y cantidad di cuponan di trabow professional.

#### **TURISMO:**

Nos lo bin cu un turismo dinamico cu lo por competi cu cualquier isla den region. Lo cambia ATA SG pa un ATA N.V. Cu tin mas flexibilidad y dinamismo. Lo atrae por medio di incentivonan mas turismo deportivo y di convention. Lo habri un oficina di turismo na Asia pa asina atrae mas turista foi di e regio ey. Lo sera tambe varios allianza strategico cu otro islana den reino, aerolina y cruise ship pa promove y bende e producto Aruba na un mercado mas amplio.

#### **IMMIGRACION:**

Aruba ta vol y vol ta vol. Pa 1 año largo lo no duna permiso di trabow pa asina hasi un investigacion di e mercado laboral local. Lo bin cu un manejo duro pa deporta ilegal. Lo tin un control estricto di ken ta drenta y sali for di Aruba. Mester prepara lugar pa e Arubianonan cu kier regresa y turistanan cu kier bin Aruba. Aruba ta sobrepopula y nos

maneho lo percura cu esaki no bai for di man. Lo hasi Aruba menos atractivo pa trahadornan door di limita e beneficionan.

#### **HUSTICIA Y CRIMINALIDAD:**

Nos lo exigi hueznan y fiscalnan cu conoce nos normanan y balornan y cu lo wordu nombra pa Parlamento. Castigonan penal mester wordu cambia pa castigo minimo enbez di maximo. Radar sofistica y equiponan moderno pa polis mester proteha nos contra atraconan y inhusticia. Mester bin cu mas polis door di introduci un verkorte opleiding pa polis cu diploma HAVO/MBO como requisito pa drenta. Mester bin cu e ley di curatela pa tene entre otro choller for di caya y repeat offenders mester haya pa un periode un sistema di monitoring. Lo bin cu un sistema di amber alert na unda cuidadanonan ta wordu alerta di immediato di criminalnan peligroso cu ta gana rond of muchanan cu ta perdi.

#### **ANTI-CORRUPCION:**

E piscanan grandi mester wordu gara y sera den prison pa asina duna ehempel cu corrupcion no ta wordu tolera. Nos mes no por investiga nos mes ya cu e corrupcion a penetra riba diferente nivel. Lo bin cu un instancia internacional manera Transparency International pa investiga casonan corrupto. Manera drenta Parlamento CURPA lo usa e instrumento di Parlamentaire enquête pa investiga proyectonan corrupto. Lo cambia leynan pa bin mas check y balances y pa sera buraconan cu ta hasi posibel cu actonan corrupto ta wordu cometi. Nos lo introduci un “Klokkenluiderswet” na unda actonan corrupto por wordu denuncia anonimamente y cu proteccion y compensacion pa esnan cu hasi e denuncio. Mester hasi tambe cambionan den ley pa loke ta e procedura pa entrega keho na ministerio Publico. Lo bin cu un asina yama “term limit” pa politiconan pa evita cu politiconan ta keda mucho tempo den Parlamento y gobierno pa asina nan no cai den tentacion di corrupcion.

#### **SALUBRIDAD PUBLICO:**

Nos lo baha e tempo pa warda pa un cita cu un specialista door di bin cu mas specialista. Nos lo habri e mercado pa mas clinica y urgent care cu por baha e lista di espera pa un operacion y tratamiento di emergencia. Lo amplia e pakket di AZV cu remedenan di tera produci na Aruba y tambe tratamentonan natural. Tambe nos lo inclui den e pakket di AZV un seguro di biahe pa gastonan medico inespera cu un cliente por haya su mesa den den exterior. Tambe por scohe si kier remede generico of original y por hasi test mas frequente pa prevencion. Medicongan cu hasi fout cu patient por perde nan licensia y dokter di cas mester tin cierto equiponan den nan oficina cu por detecta si un patient tin un cierto problema.

#### **ENSEÑANZA:**

Nos lo introduci enseñanza flexibel na unda e studiante por scohe si e kier sigue les mainta of atardi. Lo introduci tablet na skol pa entre otro baha gasto di boeki, hisa calidad y keda altante di desaroyonan nobo. Maestronan mester wordu evalua conforme criteria objetivo pa e calidad di les cu nan ta duna. Unabez cu e calidad subi e drop outs lo baha y mas atencion por wordu duna na e grupo aki. Nos lo introduci e opcion di “homeschooling” y gobierno lo cubri e gastonan pa cu esaki pa e muchanan special. Lo bin back cu un beca pa studiantenan cu ta sigue un estudio avansa cu tin escasez den dje den e mercado laboral na Aruba.

Skolnan cu mester renovacion lo haya esaki y lo adapta klas na e necesidad di studiante.

#### **ASUNTONAN SOCIAL Y LABOR:**

Tur ayudo social mester wordu hisa pa 70% di e salario minimo. Nos grandinan mester haya mas beneficionan y atencion. Lo introduci un sistema di taxi comparti pa nos grandinan y esnan cu limitacion fisico. Tambe lo no cobra impuesto di salida pa nan. Nos grandinan cu tin un pensioen di trabow solamente ta paga e werknemersbijdrage di AZV y lo haya prioridad den servicio medico. Mester involvi y traha mas organizacionan social pa problemanan social. Nos lo bin cu un programa pa reintegra hendenan cu pa hopi tempo ta cobra bijstand, ex-presos y esnan cu limitacion fisico den e mercado laboral por medio di incentivonan pa e doñonan di trabow. Ayudo social pa esnan cu limitacion fisico lo wordu hisa pa salario minimo. Lo bin cu mas actividad pa nos hobenan despues di skol. Nos lo renova tambe tur centro di bario y hasi esakinan accesible pa tur hobenan y nos lo bin back cu Fundacion Desaroyo Educacion Communitario.

#### **OBRANAN PUBLICO:**

Nos lo bin cu un Mega proyecto pa San Nicolaas and beyond cu Lo boost e economia di Aruba en general y esun di San Nicolaas en specifico. Lo bin cu un servicio di teriferico for di San Nicolaas pa farro blanco cu un parada den Arikok. E planta di recycling di sushi grof lo bin na San Nicolaas. Tambe lo manda algun cruise ship pa San Nicolaas y bin cu un servicio di ferry di cargo y pasahero. Lo construi 3 tanki di awa pa store e awa cu nos lo importa for di Colombia pa nos plan di agricultura. Lo bin cu molina cu lo yuda alivia e problematico di awa cu ta keda para ora awa yobe. Tur rontonde lo haya den tur skina zebrapad.

#### **MEDIO AMBIENTE:**

Nos lo separa e sushi di cas for di e sushi grof y laga 1 planta procesa e sushi di cas y e otro e sushi grof. Lo sera Parkietenbos y lo cuminsa exporta e sushi pa wordu procesa den exterior. Serlimar lo recohe sushi grof 1 biah pa siman pa asina wordu hiba pa e planta di recycling. No lo permiti companianan coba burraconan pa bende graniel y santo pa proyectonan grandi pa evita mas dump ilegal. Pa crea un Aruba limpi y pa recycling lo introduci un asina yama statiegeld ariba boter y bleki na unda e consumidor lo haya e placa aki back ora entrega e boter y bleki. Lo baha invoorrechten pa autonan electrico y LPG. No mas molina di biento y un morotorium ariba trahamento di hotel y condiminum.

#### **TRANSPORTE:**

Nos lo bin cu un arolina nacional y un ferry service di cargo y pasahero. No lo wordu duna mas permiso di taxi y lo introduci un sistema di taxi comparti pa nos grandinan y esnan cu limitacion fisico. Impuesto di salida na airport lo baha. Pa viahenan den Reino esaki lo bira \$20. Pa nos grandinan y esnan cu limitacion fisico lo no tin impuesto di salida.

#### **TELECOMMUNICACION Y MEDIA:**

Internet ariba speed di 2G lo ta gratis ariba henter Aruba. No mas radio y un control severo di radio ariba decencia. Tele Aruba mester bira un Tele Aruba N.V. cu programanan educativo y show pa asina e bira e canal di pueblo back.

### **AGRICULTURA, PESCA Y CRIA DI BESTIA:**

Nos mester produci nos mes un cuminda y lo stimula agricultura ariba nivel macro, meso y micro. Tereno di huur cu no ta wordu usa pa agricultura of cria di bestia lo wordu tuma bek pa asina cuminsa cu agricultura y cria di bestia. Lo introduci greenhouses na skol pa muchanan cuminsa sina na edad jong di e importancia di agricultura. Nos lo habri e mercado di pesca pa asina esnan interesa cu ayudo di gobierno por bira piscador. Cria di bestia tambe ta importante y lo importa bestia pa tin sufficiente pa nos pueblo.

### **REFORME DI BELASTING:**

Nos lo cambia e sistema di belasting for di uno progresivo pa uno di 3 tarifa cu lo pone mas placa den bo cartera. E prome tarifa ta 5% pa entrada te cu Afl. 35 mil. Pa entradanan entre Afl. 35 mil y Afl. 75 mil e tarifa lo ta 15% y pa entrada ariba Afl. 75 mil 30%. E sistema nobo aki lo subi e poder di compra di e ciudadano y lo stimula mas inversion den negoshi chiquitonan ambos lo tin un efecto positivo pa e economia. Nos lo kita e sistema accumulativo di BBO y hasi esaki un flat rate di 5% y nos lo elimina BAZV. Invoerrechten ariba computers lo wordu elimina y tambe ariba cuminda saludabel. Tambe e pagador di belasting lo haya su placa back den 3 luna y si esaki no ta e caso gobierno mester duna e pagador interes pa cada luna cu e no risibi e placa.

**EDAD DI PENSIOEN:** nos lo baha e edad di pensioen ariba un manera responsabel for di 65 aña pa 60 aña na unda bo por scohe si bo kier bai cu pension cu 60 of 65. Tambe nos lo individualiza e pago di pensioen AOV na unda parehanan casa lo cobra individualmente e suma di pensioen AOV di un soltero. Esaki lo ta un adelanto di como 500 florin pa luna pa parehanan casa. Nos lo limita e derecho pa haya un pensioen di AOV na esnan cu tin nacionalidad Hulandes.

**DEPORTE:** nos kier hasi di Aruba un isla deportivo. Placa di Lotto pa Deporte mester wordu inverti pa desaroya tur ramo di deporte na Aruba. Tur hende mester haya e oportunidad pa desaroya nan talentonan deportivo y e no mester costa casi nada. Muchanan mester wordu involvi den deporte di un edad jong. Nos lo desaroya turismo deportivo door di organiza weganan internacional aki na Aruba. Deporte ta importante pa e personalidad y salud di un persona.

**NORMANAN Y BALORNAN:** amienda 7 ta duna parehanan homosexual e derecho legal di ta wordu considera como un pareha casa. Amienda 7 ta igual cu casamento y nos lo percura cu e amienda 7 lo no bira un ley. Euthanasia ta keda prohibi na Aruba bow di tur circumstancianan y nos no lo permiti pa cannabis wordu legaliza di ningun forma. Abortus ta keda ilegal y lo persigue e doctornan cu ta cometи abortus. Lo bin cu reglanan pa evita mal uso di alcohol.